

# Trawsnewidiad

## Cenedl:

### Beth allwn ni ei ddysgu gan y Tadau Methodistaidd?

John Aaron

#### Un ffaith hanesyddol fawr y Diwygiad Methodistaidd

Mae llawer o ffeithiau hanesyddol rhyfeddol yn gysylltiedig â hanesion y Tadau Methodistaidd, gwŷr fel Howell Harris (1714-73), Daniel Rowland (1713-90), Thomas Charles (1755-1814), John Elias (1774-1841) a llawer rhagor, ond nid oes un, mi gredaf, i'w chymharu â'r ystadegau o ran nifer yr addolwyr.

**1730**

Tua 70-80 o achosion Anghydfurfiol yng Nghymru

1-2% o boblogaeth y wlad yn eu mynychu (tua 7,000)

**1851**

2,088 o gapeli Anghydfurfiol

53% o'r boblogaeth yn eu mynychu (tua 700,000)  
15% ychwanegol yn aelodau yn yr Eglwys Wladol

Hyd yn oed o dderbyn bod peth anghytundeb ynghylch yr union ffigurau, nid yw hynny'n lleihau ffaith anghredadwy yr hyn a ddigwyddodd. Ymhen can mlynedd trawsnewidiwyd cenedl yn llwyr. Yn ei moesau, yn ei diwylliant, yn ei chredo, yn ei bywyd cymdeithasol, hyd yn oed yn ei gwleidyddiaeth, roedd cenedl y Cymry yn 1851 yn genedl hollol wahanol i'r eiddo 1730.

#### Y rheswm am y ffaith hon

Defnyddiodd haneswyr academaidd ymadroddion megis 'apêl y newydd', neu 'y rhyddhad sydyn o egni wrth sylfaenu enwad newydd', neu oherwydd 'gallu trefniadol rhyfeddol Thomas Charles' (David Williams, *A History of Modern Wales*).

Annigonol yw'r rhesymau hyn. Mewn gwirionedd, nid oes esboniad posibl am y fath newid syfrdanol heblaw am esboniad goruwchnaturiol. Diwygiad yw'r unig

esboniad credadwy. Effeithiau nerth a dylanwad yr Ysbryd Glân. Duw yn bendithio tref, neu ardal, neu wlad fel yn yr achos hwn, drwy ymweld â'r wlad mewn cyfnod o adfywiad.

Yr Ysbryd Glân yn chwythu lle y mynno, yn arddel pregethu ei weision, yn bywhau pechaduriaid a oedd yn feirw, ac yn gwneud hynny i'r fath raddau nes bod cymeriad cenedl yn newid. Dyna fel y deallai'r Methodistaidd eu hamserau, a thrwy edrych ar eu hymateb i'r gwirionedd hwn efallai y dysgwyr rywbeth o werth i'n dyddiau ni.

#### Y Tadau Methodistaidd a'r Ysbryd Glân

Mae geiriau Sechareia mor addas yn y cyswllt hwn:

*Hyn yw gair yr Arglwydd at Sorobabel, gan ddywedyd, Nid trwy lu, ac nid trwy nerth, ond trwy fy ysbryd, medd Arglwydd y lluoedd (Sechareia 4:6).*

Neu 1 Corinthiaid 2:4:

*A'm hymadrodd a'm pregeth i, ni bu mewn geiriau denu o ddoethineb ddynol, ond yn eglurhad yr Ysbryd a nerth.*

Gwelodd y Tadau yn yr adnodau hyn ddisgrifiad llythrennol o'u profiad hwythau wrth bregethu.

Roedd ymwybyddiaeth ddofn o'r Ysbryd Glân, a dibyniaeth lwyr arno:

**1** Os oedd yr Ysbryd i arddel eu geiriau rhaid oedd sicrhau mai neges yr Ysbryd a bregethid. Golygai hynny, wrth gwrs, fod rhaid wrth neges Feiblaidd, ond pa neges o'r Beibl? Beth oedd y genadwri ddwyfol ar gyfer yr awr? Cyn dechrau ar baratoi pregeth rhaid, felly, oedd cael sicrwydd o feddwl yr Ysbryd. Dyma Robert Roberts, Clynnog, tua 1790:

Galwodd y Parch. John Williams, Dolwyddelen, heibio iddo unwaith, i edrych amdano. Yr oedd y ddau yn gyfeillgar iawn... 'Robert bach,' meddai, 'dywedwch ym mha le y byddwch yn cael y pregethau ofnadwy yma sydd gennych?' Gafaelodd Robert Roberts yn ei

